

## ԽՐԻՄՅԱՆ ԵՎ ԻԶՄԻՐԼՅԱՆ

Երկար տարիներ ունեցել եմ Խրիմյանի մոտիկությունը վայելելու պատիվը, իսկ Իզմիրյանի հետ, իր կարճ հայրապետության ընթացքում, միայն մի քանի անգամ եմ ունեցել տեսակցություն, բայց, իր բացարտության պատճառով, մի քանի տեսակցությունն էլ բավական էին Իզմիրյանին ճանաչելու: Եվ կարծում եմ հետաքրքրական կլինեն «Հորիզոնի» ընթերցողի համար նրանց բնավորության այն գծերը, որոնցով նրանք մոտենում էին իրար կամ հեռանում էին իրարից: Երկուսն էլ խոշոր հայ դեմքեր էին, գերազանցորեն հայ. երկուսն էլ շատ ապրած իրենց ժողովրդի տառապանքով:

Երկուսն էլ հոգևորական էին բառի լայն իմաստով, երկուսն էլ սիրում էին ս. Գիրքը ու նվիրված էին հայրենի եկեղեցուն: Երկուսն էլ ունեին իրենց հավանած մարդիկը հոգևորականների մեջ, բայց առհասարակ չէին սիրում հոգևորականությանը: Իզմիրյանը մինչև անգամ զգուշացնում էր հոգևորականներից, իսկ Խրիմյանը առանձին թշնամություն ուներ աստվածաբանների դեմ: Երկուսի մասին էլ կարծիք էր տարածված թե հեղափոխական մարդիկ էին, բայց երկուսն էլ ուրույն հայացք ունեին հեղափոխության վրա և ասում էին արյունը: Երկուսն էլ վշտով էին հիշում գոլիցիյան օրերը և առանձին հաճույքով էին կանգ առնում ներկա փոխարքայի վրա:

Բայց ավելի շատ են այն կետերը, որոնցով նրանք տարբերվում էին իրարից:

Իզմիրյանը պատկառում ու ճնշվում էր կաթողիկոսական գահից, իսկ Խրիմյանը թեթև աչքով էր նայում գահի վրա և մինչև անգամ ոտանավոր էր գրում, թե Քրիստոսի հետևողին անվայել է գահը: Իզմիրյանը գահն էր իրենից բարձր նկատում, Խրիմյանը իրեն էր գահից բարձր համարում:

Իզմիրյանը մի տեսակ քաշվում էր, երբ ասում էին՝ Ձերդ վեհափառություն, Խրիմյանը նեղանում էր, և սիրում էր, որ իրեն «Հայրիկ» կանչեն, հայոց Հայրիկ:

Իզմիրյանը միշտ և միայն գործից էր խոսում, Խրիմյանը գործից չէր խոսում և ձանձրանում էր գործից խոսելիս:

Իզմիրյանը մարդկանց մոտեցնում էր գործի համար, Խրիմյանը՝ զրույցի:

Իզմիրյանը սիրում էր խորհուրդ հարցնել, Խրիմյանը վիրավորվում էր, երբ խորհուրդ էին տալիս:

Իզմիրյանը աջը չէր տալիս համբուրելու, Խրիմյանը միշտ մեկնում էր համբուրելու:

Իզմիրյանը ազնիվ մարդիկ էր որոնում, Խրիմյանը ջերմ երկրպագուներ:

Իզմիրյանը մարդկանց հարգանքով էր վերաբերվում, Խրիմյանը հեզնանքով:

Իզմիրյանը միշտ լուրջ ձևով էր խոսում, Խրիմյանը երբեմն էր լուրջ ձևով խոսում, իսկ միշտ հեզնելով ու կատակով:

Իզմիրյանը պարզ էր ու բաց սիրտ, Խրիմյանը բարդ էր ու խորը:

Իզմիրյանը դյուրագգաց էր ու հուզվող, Խրիմյանը քամահրող ու հանդարտ:

Իզմիրյանը օրենքից էր խոսում, Խրիմյանը Ավետարանից:

Իզմիրյանը սրտալի ու շիտակ գործիչ էր, Խրիմյանը խորամիտ փիլիսոփա:

Իզմիրյանը անկասկած մաքուր էր, Խրիմյանը անպայման մեծ: